





武夷山志卷之一

東魯衷仲孺訂修

長樂郭振錫

名勝編

武夷以奇勝名寓內說者謂詭幻百出人工  
毋論卽鬼工爲之政亦未易幽人韻士徃徃  
獨窮其奧然或康樂之屐殊域爲躡志餘之  
舸夙因木削不免索圖經以當臥遊耳于是

作名勝編

一曲 凡二十條



一曲之溪左有大三峯峰之上則有昇真洞張僊巖  
投龍洞天鑑池禮斗壇徐僊巖僊鶴巖禪巖登僊  
石大王之北有幔亭峯幔亭之陰有換骨巖白雲  
溪處排峯巖三姑石北斗峯道者巖大王之東有  
靈雲洞大王之西有僊羊石溪右有獅子巖大小  
觀音峰兜鍪峰赤霞嶺溪水之濱有虎鼻石鯉魚  
石水光石僊猿石鐵板嶂儒巾石

大王峰在溪之東北高數千仞矗立雲表儼若一  
柱故又名天柱舊記謂魏王子騫與張湛等十二

人隱於此峰之石室故其峰以大王爲名其東石  
壁之上豁然一室是爲昇真洞廣數丈深倍之中  
有雷文龕壩五皆盛僊人蛻骨其一置石窖窖口  
狹束不可出洞前有黃心木縱橫爲棧險而不墜  
又有圓木剝成四船相覆半枕於洞船中盛函二  
十餘函中各盛僊蛻又有一穴橫插雙木爲橋橋  
之西壁別開一罅中藏香爐藥甕數事洞下直裂  
一隙徑逾尋許旁有鼎爐從昇真洞口折西稍北  
有梯倚壁梯窮登岨有巖廣數丈深丈許漢人張



垓坐解於內真身跌踞石上首微右顧舊傳張臨  
化時其母呼之因而回首右顧巖西壁開一隙直  
上數十仞可騰蹕而升隙窮而橫一穴出穴稍東  
有石門繇門入而登絕頂頂甚夷曠多產檜松栢  
竹芝艸之屬天啟甲子墾者掘得銅鼎綠色奇文  
竟不知其何代物也宋建昇真觀觀前爲通天臺  
又名禮斗壇傍有天鑑池巖窪生成四時不竭可  
炤星斗池右有投龍洞洞門狹小而直下垂縷百  
餘丈方及泉宋自乾興初終宋之世多遣使降香

投金龍玉簡於洞中繇昇真洞之左捫巖凌險而  
至徐僊巖巖扉向東宋徐熙春蛻化於此真身踞  
石而坐萬曆間鄉民以禱雨移之於會真廟後遂  
不復歸峰之西壁崖石皴裂紋如繪鶴者爲僊鶴  
巖巖之西昔有禪僧冲舉於此是爲禪巖又名望  
鶴臺臺下爲登僊石

幔亭峰一名鐵佛嶂在大王峰北本相聯屬其高  
稍亞若階級頂復平曠舊記云秦始皇二年魏王  
子騫與皇太姥武夷君設幔亭綵屋宴鄉人於其



上故名而平曠處名宴僊壇峰之左有石盤陀方廣數十丈者爲漢祀壇漢武帝以乾魚祀武夷君卽此壇也

換骨巖在幔亭峰北巖半石室方廣六七丈可容百餘人室內有泉七孔甘冽不竭繇巖下石罅斜攀至室外乃有黃心木爲橋以達室道書云學僊者當爲天台注名武夷換骨今巖中猶有僊蛻九函廬山僊人羅公嘗受寶印玄文於此

白雲庄一名白雲溪處在換骨巖側四面俱峻壁入石門半里許忽平曠有丹井一石臺遺院遺址排峰巖一名靈龕在換骨巖左輪囷如龕三姑石在幔亭峰後三石差肩而立

北斗峯在三姑之後七峯聯絡狀如北斗道者巖在三姑石左二石離立狀類寒山拾得靈雲洞在大王峯之東與峰相對洞有上下幽邃莫測其中石盆石硯皆天然生成卽孔葉莊三女僊煉丹之處

僊羊石在大王峰西大小六七成羣



獅子巖一云獅子峰在溪南蹲踞昂首狀如獅子  
大小觀音峯一二云觀音巖在獅子巖西二峰對峙  
巔微戴土草木蒼鬱藤蘿垂蔓狀若觀音寶冠纓  
絡因以爲名

兜鍪峰一名兜擔石一名賭娘石其勢前高後下  
形如兜鍪西壁有穴內藏一舟舳艫俱完又名閣  
船巖

赤霞嶺在獅子峰七八里其上有洞曰赤霞洞最  
先見日之出

虎鼻石在溪水之濱兩竅仰峻形如虎鼻

鯉魚石在水中如遊鯉躍波

水光石一名晴川石在水之濱倒影溪中與澄波  
相輝映

僊猿石在水光石後靜夜月明猿每嘯於其上

鐵板嶂俗名掛榜巖在大王峯右溪水之濱石色  
蒼黑剝削如板長數十丈而高稱之

儒巾石在鐵板嶂下半在水中狀若儒巾

二曲 凡二十條



二曲之右有玉女峰妝鏡臺勒馬巖凌霄峰三才峰  
虎嘯巖倉廩山靄巖飛鳥臺舞雪臺鼓角巖五老  
巖小藏峰僊館巖溪水之濱有翰墨巖題詩石印  
石僊剝石

玉女峰在二曲溪右三石差肩而立其色紅潤有  
姝麗之態背有二泉穴冬夏不涸

粧鏡臺在玉女峰前石面相向

勒馬峰卽粧鏡臺之頂其石迴轉

凌霄峰在勒馬巖右石高而銳

三才峰在玉女峰側峰巒鼎列中峰尤高而聳上  
有飛泉石門之勝

虎嘯巖在玉女峰後其傍有歛袖峰太平巖太極  
巖馬枕巖

攬石峰在虎嘯之南兩石攬結高聳從巖隙中累  
石疊梯而上絕頂寬平

倉廩山在虎嘯巖西相傳陳有定聚糧屯兵於此  
至今山石上猶有煨燼殘穀在經風雨不腐又有  
偃月刀一口插巖縫間可見而不可得墾山者常



掘得銅劍刀戟之屬

霧巖在倉廩山西去虎嘯巖約四五里穹崖峭削壁立千仞其下鈇斨嵌空因爲广室棲諸神像曰靈巖庵有三洞俱可容數十人其一尤深廣風從中出晝夜不絕亦名風洞洞口爲觀音閣葛僊館洞內兩崖相倚長數百丈中分一線不合仰見天光名一線天其下有生成石穴溜滴汪汪瑩如青玉名勝水井繇一線天右有窄徑僅容一人側足而上可至絕頂頂上平曠約數里許其中有僊浴

池自生魚蝦相傳陳有定立寨其上天兵攻之絕其汲道有定從山椒示以生魚今山下時有遺鏃折戟爲耕夫所拾巖南兩峰竝立圍整如臺稍四有石爲關隘

飛鳥臺在一線天頂

舞雪臺在一線天左

鼓角巖與風洞對立

五老巖在風洞前五山拱立如老叟之形

小藏峰在玉女峰西半巖斷缺處插木度板望之



如櫛舊記云昔控鶴僊人語魏王子騫輩曰公等  
八百年後可藏蛻於此今有黃心木函藏十三僊  
蛻骨其中

僊館巖一名僊學堂在小巖峯上巖壁廻環中有  
石室几案布列其間

僊船巖卽小巖峰之峭壁半巖間一穴內有二小  
船架於橫木之上千年不壞

翰墨巖在溪北鐵板嶂西崖石隱起狀若墨鋌下  
有二孔如人目俗呼回子獻墨巖

題詩石在玉女峰下水涯昔人有題在上

印石在玉女峰下水中

僊冠石在玉女峰下水中

三曲 凡十一條

三曲溪之左有會僊巖昇日峰金井澗車錢巖上昇  
峰溪之右有大巖峰僊船巖僊機巖芙蓉洞溪水  
濱有三盃石水樂石

會僊巖在鐵板嶂西其石方平可坐數十人

昇日峰在僊巖側晨旭初昇焰映爍燿其下有金



光石

金井澗在昇日峰陰澗邊多隱者之居

車錢巖在昇日峰側舊記云聖姥常鞭牛載錢至此上有白玉蟾丹爐

上昇峰在昇日峰右其色青紫又名紫峰相傳張真君於此上昇

大藏峰在溪南其勢峻拔峭壁千仞下際清淵壁間有數室皆橫插板木望之如棧相傳以爲虹橋板飛插于此室中有器圓者如管方者如筍又有

如杵者如盤者又石罅中有小艇盛僊蛻數函鄉民遇旱以竹繩繫籃人坐其中數人從巖絞車輻轡下繩又使人伺於溪北候籃至罅邊擊鼓則止輻轡籃中人以鐵鈎鈎入罅中請出僊蛻溪北鳴鼓復返輻轡而下蛻至醮壇禱雨立至禱畢其蛻自返故處他日復取爲孕婦所厭今雖靈驗不復飛上矣

僊船巖在大藏峰側卽小藏峰之背半壁有二船架於橫木歷劫不壞



僊機巖亦小巖峰之背峭壁之半銜開一洞內有雜木曲直縱橫相傳以爲僊人機杼

芙蓉洞在昇日峰南內有漱玉泉曜金池

三盃石在溪水之中平如砥可坐數人

水樂石在三盃石側水石衝激作金石管絃之韻

四曲

凡十三條

四曲溪之右有鷄窠巖金鷄洞宴僊巖李僊巖御茶園喊山臺通僊井雲巖溪左有僊釣臺希真巖溪水之濱有試劍石小九曲釣磯拜章臺臥龍潭

鷄窠巖卽大巖巖背半壁有穴外隘中宏木篠縱橫堆積如鷄棲建安記曰鷄巖隔澗西與武夷相對半巖有鷄窠四枚峭不可登傳有羣鷄約數百飛翔其上雄者類鷓鴣坤元錄云武夷澗東一巖上有鷄棲卽此是也金鷄洞在鷄窠巖下從舟中仰視若不甚深廣萬曆間羽士程玄應自巖懸轆轤入其中則有楠木無數皆長三丈徑尺餘上閣僊蛻十三函每函或頭顱一二片脛骨一二莖手足一二節裹以錦帕一函中有鶴骨頭與足各一



又有楠木剝一舟長丈餘濶三四尺細羅香末并香灰幾滿洞中香灰成堆者纍纍然上洞視下洞其口尤小人不感到有張富郎者年八十餘冒險入其中則見數人鼾睡香灰內傍有銅磬覆地富郎翻而視之磬下一鷄驚起展翼扇灰撲目即倉皇俯伏半晌稍息亟內籃縋下半空籃掀富郎墜入舟子懷中竟亦無恙年九十而終應玄曾見富郎乃得其詳而陳司馬爲應玄記其實  
宴僊巖在鷄窠巖頂嘗有僊鶴鳴於上

李僊巖一名燈窩巖上有石龕相傳李僊坐化於此山勢峻絕無路可登

御茶園在李僊巖下

喊山臺在御茶園中元暗都刺建臺高五尺方一丈八尺有亭曰喊泉亭有井曰通天井泉極甘冽宋元時每驚蟄日有司率所屬致祭命衆茶戶鳴金擊鼓同喊曰茶發芽則泉水漸滿造茶畢水遂涸真人張邈過至此飲其水曰非茶之美乃此水之力也



通僊井一名龍井一名喊泉一名呼來泉

雲巖在李僊巖後巖半有石室可容百人昔爲巨蟒所據詹法師驅之因剏雲巖庵於巖下

僊釣臺在溪北與大藏峰相對懸崖深穴俗呼爲真武洞外狹內寬中有僊蛻數函又有磁甕若酒壘者數枚形精緻異于今器

希真巖在拜章臺側

試劍石在溪北水濱昔控鶴僊人試劍於此石分爲二中間可通小舟盤迴旋繞號爲小九曲

釣磯近在試劍石半溪中可坐以垂釣旁有石如魚籬故名

拜章臺卽釣磯別名以其上平坦方正又有石如香爐渾然天成也

臥龍潭在金鷄洞下深不可測中有巨魚藏其中相傳許旌陽斬蛟欲盡殺九子其幼者願皈正道旌陽許之命護此山人見者多不利云

五曲 凡十七條

五曲溪之左有大隱屏伏羲洞羅漢巖黑洞接笋峰



鐵象巖雲窩撞冠石昇真洞茶洞清隱巖玉華峰  
溪之右有晚對峰天柱峰更衣臺溪水之濱有茶  
竈石平林渡

大隱屏與釣臺相連一峰峭拔夷上直下方正如  
屏兩麓陂陀環抱其下爲朱文公書院其上有玄  
元道院石室石臼猶存

伏羲洞在隱屏後一名先天洞廣數丈有石列如  
畫卦

羅漢巖在伏羲洞左一頂禿骨露下有石室故名

黑洞一名回回洞在伏羲洞外其上坦平卽鐵笛  
亭故址

接笋峰在隱屏北與隱屏兩峰相連其西南有一  
石附屏狀若立笋高數十丈倚梯十丈梯盡右折  
鑿石爲徑僅容趾名曰鷄胸穿崖環以鐵纜登者  
捫纜側行石徑斷處復橫木爲棧至頂則兩壁洞  
裂一磴孤懸下俯百丈名曰龍脊上甚平坦有道  
院亭館泉池園圃

鐵象巖在接笋下偃伏如象前有雲窩道院



雲窩在接笋峰下後倚隱屏宋陳丹樞煉丹故址  
長樂陳司馬省築別業於此

撞冠石在接笋峰下狀若道冠旁有棘隱庵遺址  
昇真洞在雲窩東舊刻昇真洞三字內有石曰石  
竈

茶洞在接笋峰側洞門甚隘內境夷曠四週皆穹  
崖壁立土人種茶視他處爲最盛

清隱巖在茶洞內四環絕壁石逕可以攀躋  
玉華峰在隱屏北白石羅列玉光燦然

晚對峰與大隱屏隔溪相對舊名紫石屏又名小  
隱屏後以晦翁作亭其上故改今名

天柱峰在晚對峰右峭拔特立相傳魏王子騫於  
此上昇然子騫顱骨尚存豈上昇者非子騫或非  
子騫顱骨耶峰後與靈巖相屬

更衣臺在天柱峰下平正如几俗云魏王子騫於  
此更衣以登天柱者也

茶竈石在溪水之中天成巖窩朱晦翁嘗於此烹  
茶旁刻茶竈二字



平林渡在五曲口丹壁青林別是一景

六曲 九九條

六曲溪之左有僊掌峰天遊峰響聲巖蒼屏峰陷石堂玉版巖三仰峰溪之右有僊跡巖溪之中有曹家石

僊掌峯在茶洞之上巖壁平削巖半石紋如人掌者數處晴明時紅光相射旁有瀑布下爲僊浴塘天遊峰在僊掌峰頂隱屏平立於前外高敞而內幽邃拔出羣峰之上三六峙流一覽而收峰頂有

胡麻澗自山當庵曲折而來冬夏不涸相傳昔有胡麻飯從中流出

響聲巖在僊掌之頂巖中嵌空遊人咲語聲輒響應

蒼屏峰卽響聲巖北方正如屏朱文公紀遊有字陷石堂從僊掌巖西迤邐而入石崖相倚成門門內小澗橫木爲杠僅可容足移數武地忽平曠桑麻禾黍儼然村落故又名爲小桃源此中舊有石堂寺宋天聖二年二月朔夜爲雷雨陷沒石門內



一穴中藏銅佛可見而不可取

玉版巖在陷石堂之左

三仰峰在陷石堂巖頂之左三峰聳拔斜插比連若舉首企仰之狀第一峰下有棋盤石方正平坦可坐數十人第二峰有白玉蟾丹竈第三峰有洞曰碧霄高出半空構屋中居凭欄可望數十里洞口鑿石門逕而入其上有丹井井面作碧琉璃色相傳白玉蟾浴丹于中此峰高爲武夷之冠僊跡巖在溪右與僊掌相對有二足痕印於崖上

曹家石在僊掌峰下溪中相傳昔有曹姓者過此覆舟忽得石以免因名之以紀其異

七曲

凡六條

七曲溪之左有北廊巖天壺巖即官巖溪之右有神臯巖石門巖溪水之中有上水龜石

北廊巖在陷石堂門口盤旋聯屬狀若廊廡以其在溪之北故名

天壺巖在北廊巖頂峰巒環合中有道院石泉泉極清徹天壺觀在其下



郎官巖在天壺峰前

神臯巖在溪右山形高峙盤亘五百餘丈以其爲  
僊靈窟宅故名神臯有上下二處上神臯以嘉靖  
中住僧拉妓入宿一夕爲風雷掣去庵宇基地盡  
圯今惟下神臯猶存

石門巖與響聲巖相對有石穹窿如門

上水龜石在北廊巖下溪中

八曲

凡十四條

八曲溪之左有鼓樓巖鼓子峰吳公洞超峰鐘模石

猶兒石靈峰猴藏峰煙際石丘公巖三教峰香爐  
石三層峰溪水之濱有筍洲下水龜石禪笠石霞  
洲

鼓樓巖與天壺巖相接稍入山中視群峰特高峻  
宋劉夔志云洞中有栴木樓其下四楹近世惟莆  
田卓有見如其說諸志皆以爲石樓然其實木也  
高廣僅三四尺瓦甃亦皆以木爲之窻櫺戶牖咸  
具製甚精巧釘出於木外者四五分緣壁可登但  
下臨清潭可怖耳巖下有桃花澗



鼓子峰在鼓樓巖前兩峰屹立有石扣之轟然有聲如鼓

吳公洞在鼓子峰南巖壁高廣中裂一穴外隘中宏可容四五十人吳公尸解成道之處今蛻尚存超峰在鼓子峰後

鐘模石在鼓子峰後高數十丈其形類鐘

貓兒石在鼓子峰側臥伏如貓

靈峰一名白雲巖在鼓子峰右奇聳高峙半壁網緼如雲右有一洞中貯僊蛻數函及小艇一歲久

不壞

猴巖巖在鼓子峰前其下有百花庄在洲渚間煙際石與猴巖峰相對高插煙霄

丘公巖在靈峰下石室橫亘數十丈云有丘公者於此成道

三教峰在鼓子峰前三峰竝立若儒釋道之冠香爐石在三教峰下方正如爐

三層峰在鼓子峰後三峯鱗次每將雨則先陰霾將霽則先明淨



筍洲在鼓子巖下溪濱上有麗澤堂遺址

下水龜在筍洲邊

禪笠石在水龜邊

霞洲在溪右水濱中有雲確霞屏斷橋曲塢

九曲 凡九條

九曲溪之左有寒巖香石毛竹洞挨人石溪之濱有

星渚渡大小廩石魚磻石將湖石放生池

寒巖在靈峰玄都觀後有一泉泓流其左冬夏不

涸

香石在靈峰下

毛竹洞在靈峰右巖壑幽邃毛竹茂密

挨人石在毛竹洞外行者側身而過石或搖動若

挨人然

星渚渡在九曲溪盡處文公所謂桑麻之墟是也

大小廩石在溪上二石圓峙如倉囷

魚磻石與筍洲相對

將湖石在魚磻石右

放生池在九曲中宋端平元年奉旨放生於此



自神臯巖下至石鼓渡並禁捕魚

九曲折而南 凡三條

九曲折而南爲山之陽則有齊雲峰藍原澗赤巖

齊雲峰高插雲漢靜夜時常見天燈

藍原澗在山南藍誠藍智卜室於此

赤巖在藍原澗東其色純赤高數十丈

九曲折而北 凡二十二條

九曲折而北爲山之陰有馬月巖玉華洞鑄錢巖水  
簾洞翠竹窠丹霞嶂馬頭巖馬鞍巖象鼻巖火焰

峰玉柱峰天心峰葛香林葫蘆石紫嶺峰杜葛巖  
魚巖鷹嘴巖九井巖花巖黎道巖桃源洞碌金巖  
馬月巖九曲溪發源於此

玉華洞巒如削玉境多清絕舊名幽微碧玉洞天  
鑄錢巖在七曲之背有石稜層似梯

水簾洞在武夷山北丹霞嶂之左石壁高聳綿亘  
數十丈倚巖爲屋不施片瓦而雨露不沾巖上有  
水自頂瀉下隨風飄灑疎密不定溟濛聯絡長如  
簾垂瑟瑟然聲清洞府倏忽變態不一一名唐曜



洞天内有清微洞真觀乃宋道人江成真所創嘉靖間道人王廣僊成坐化遺蛻尚存宋儒劉甫嘗讀書於此

翠竹窠在水簾東北繇鳥道入深塢內復半曠丹霞嶂在水簾右石色丹赤雄峙如城綿亘層疊馬頭巖在水簾洞右聳拔昂首勢欲驤雲而上馬鞍巖在馬頭巖右狀若雕鞍

象鼻巖在馬頭巖之左其巔有石帖在巖頭直垂而下若象鼻然

火焰峰在水簾洞右高聳如飈焰故名

玉柱峰與火焰峰正相對圓直瑩潔高數十丈

天心峰在火焰峰右象鼻巖左三峰屈曲毘連宛如心字或以此地深隱爲洞天之中

葛香林在天心峰後

葫蘆石在天心峰側分兩層上尖下圓

紫嶺峰在火焰峰左石色青紫

杜葛巖在天心峰東北其巔可以遠眺城邑相傳有杜葛二氏隱此巖隈累石爲門尚存遺址吳比



部中立改名杜轄今丘無可構書室其上

魚巖在杜葛巖前

鷹嘴巖在火焰峰西直聳高騫頂後尖曲如鷹嘴  
九井巖在水簾洞左洞穴可居上有石井九口

白花巖在山之北

黎道巖在山之西北

桃源洞在山背長嶺路左之頂相傳辟支古佛棲  
此證果

碌金巖在天心峰之南杜轄巖之北舊志未載今

有一丘道人者結廬其上道人自云年五十而失  
明六十始學爲內養之術未幾復開遂棄捐塵慮  
遯跡山中今已八十有七雙眸炯炯燈下作蠅頭  
細書手不停披終日忘倦



武夷山志卷之一終

武夷山志卷之一終

武夷山志卷之二

雲構篇

東魯袁仲鵠訂修

長樂郡  
振鐸書

黍離之詩悲故宮也王居猶爾彼巖棲壑寄  
者胡以志焉武夷神山也儒宮玄館具瞻九  
服葺繕責之有司呵護嚴于鬼物故雖閱劫  
而未有隳諸凡雲龕射室曲榭短楹皆割  
勝掠奇為溪山點綴即或小有變更不過揭  
新滌舊若一水精廬昔屬雲龍道院金山故



址今且改祀文成之類是也陳蹟具存于焉  
可按

一附 九十九條

一曲之上有入佳亭冲祐萬年宮會真廟僊君廟四  
賢祠王思質祠鄒東廓祠羅念庵祠宗方城祠常  
清庵昇真觀大雲寺金山寺雲龍道院止止庵金  
身寺溪光亭復古庵詠歸堂

入佳亭在溪口先名武吏亭萬曆間邑令太倉顧  
士琦易今名近已崩圯惟址存

冲祐萬年宮在大王峰左初漢武帝設壇以乾魚  
祀武夷君至唐天寶間始創屋于洲渚名曰天寶  
殿閩王審知增而廣之名曰武夷觀南唐李後主  
遷今地寶大十三年賜名會僊觀宋咸平二年太  
宗御書冲祐二字以旌其靈紹聖二年大建宮殿  
因改名冲祐紹定二年重建天寶殿元天曆己巳  
改觀爲宮加賜萬年二字 國朝仍改爲觀正統  
四年燬于火修建未畢嘉靖四年復燬明年重建  
題其門曰昇真玄化洞天門內稍北爲望僊橋橋



北爲二門扁曰勅賜冲祐萬年宮三門內爲漢祀  
亭亭上爲拜章臺臺北爲三清殿殿後爲賓雲亭  
亭後爲玉皇閣下祀十三僊閣東有方池閣後爲  
灋堂堂後爲方丈觀之中舊有持正中和賓雲等  
院橋隱觀妙觀復行間等堂玉皇閣東有方池朱  
晦翁有觀方池詩

會真廟在萬年宮外之右初鄉人以幔亭之宴得  
與僊真同會因建祠山下曰同亭宋政和間賜今  
額歲久腐頽嘉靖三年道士詹本初重修增創後

### 殿

僊君廟在會真廟之右南唐寶大間建今廢

四賢祠在冲祐觀右萬曆間建祀趙清獻胡文定

劉文靖朱文公

王思質祠在冲祐觀左萬曆間建

鄒東廓祠在冲祐觀西萬曆間建

羅念庵祠在冲祐觀西萬曆間建

宗方成祠在冲祐觀右萬曆間建崇禎九年重修  
常清庵在冲祐觀後其左有萬春庵今皆廢



昇真觀在大王峰頂巖阿中宋道士游開淵江妙  
靜妙正鑿巖壁壘石門建樓三層奉太清老君及  
十三僊今廢

大雲寺在冲祐觀東南隅南唐寶大十三年僧福  
祥建今廢

金山寺在大王峰下嘉靖中改建王陽明祠

雲龍道院在幔亭峰下卽彭祖之故址萬曆中長  
樂陳洙改爲一水艸廬中有雲龍居

止止庵在大王峰下禪巖前太姥元君及十三僊

修煉之所晉婁師鍾唐薛邴李磨鏡李鐵笛李陶  
真皆於此成道歲久荒圯宋詹美中重建延白玉  
蟾居之玉蟾爲記其事久之復廢 國朝景泰中  
道士王守端江一真復創小宇尋亦廢正德末建  
陽方道明復創嘉靖丁酉直指李公元陽復建祀  
玉蟾於其中

金身寺在止止庵左閩通文四年建後爲水漂沒  
溪光亭在水光石上今廢

復古庵在鐵板嶂前舊有白玉蟾煉丹基元金埜



庵繼隱於此有虞集題扁堊庵之後余復嬰亦煉丹其中復嬰能詩嘗與藍山兄弟倡和

常庵在兜鍪峯下宋道錄江師隆以術止錢塘潮湧理宗御書常庵二字賜之仍勅建州守爲廣其庵

詠歸堂在兜鍪峰下宋蔡杭建初杭父沈建南山書堂於虎嘯巖下歲久堂圯國朝正德十年于詠歸堂故址建九峯書院祀沈父子

二曲

凡四條

二曲之上有靄巖庵瓊瑄亭崇真庵南山書堂

靄巖庵在一線天洞中有觀音閣葛僊館相傳舊有妖蟒據洞中吐氣襲人葛僊驅之卽洞建庵其妖遂息

瓊瑄亭在翰墨巖上

崇真庵在虎嘯峰頂

南山書堂在虎嘯巖下宋先儒蔡沈建

三曲

凡二條

三曲之上有夢筆山房超真亭



夢筆山房在昇日峰下萬曆中建有致曲堂玄霜閣九霞塢五芝窩花萼臺

超真亭在大藏峰南

四曲

凡十條

四曲之上有希賀堂吏隱亭焙芳亭浮光亭思敬亭燕嘉亭宜寂亭僊史館觀山亭雲巖庵

希賀堂在雞窠巖前宋樞密陳升之建

吏隱亭在金雞洞左宋邑令趙忬建

焙芳亭浮光亭思敬亭燕嘉亭宜寂亭俱在御茶

園今廢

僊史館在四曲山之陰

觀山亭在題詩巖上宋侍郎劉夔建今廢

雲巖庵在雲巖石室中昔有巨蟒據室詹灋師驅之遂建是庵

五曲

凡十五條

五曲之上有武夷書院奪秀亭雲莊山房玄元道院雲窩水月亭清真道院水雲寮小隱堂仰止亭王文成祠洪源書堂仰高堂棘隱迎綠亭有岷瞻祠



武夷書院在大隱屏下宋淳熙間朱文公卜築內  
有仁智堂隱求室止宿寮觀善齋寒栖館晚對亭  
石門塢鐵笛亭元至正二十五年燬于兵 國朝  
正統十三年重建

奪秀亭宋儒胡致堂建在五曲盤石上致堂嘗與  
劉衡游其中劉善吹笛胡贈以詩有更煩橫鐵笛  
吹與衆僊聽之句胡沒亭廢朱文公偶携客尋其  
故址俄有笛聲發于林外公因構亭名以鐵笛  
雲莊山房在書院傍宋儒劉燾建今廢

玄元道院在大隱屏峰頂有石曰丹竈石室嘉靖  
丙辰道人汪癡願劉古松重建懷山館有僊弈亭  
癡願窩萬曆丁丑憲副姚公體信復建清微真館  
雲窩在大隱屏前宋陳丹樞建中有石曰石竈萬  
曆間少司馬長樂陳公省重建中有賓雲堂研易  
臺棲真閣遲雲亭

水月亭在雲窩右今廢

清真道院在茶洞內清隱巖中今廢

水雲寮在茶洞傍宋儒游酢建



小隱堂在茶洞內舊志云宋劉欽道讀書之所郡志云劉衡字兼道棄官歸武夷築堂名小隱仰止亭在接笋峰腰

王文成祠在接笋峰下葛屺瞻先生撰記

洪源書堂在晚對峰左宋熊禾建裔孫之璋重建葛屺瞻祠在接笋峰右崇禎己卯邑令柴世埏建仰高堂在晚對峰下宋儒劉康建

棘隱在撞冠巖前舊志云有女真修煉於此今廢迎綠亭在天柱峰劉康建

六曲 凡十二條

六曲之上有天游觀三友堂純陽祠僊掌庵天均亭森天閣劉文簡公祠石堂寺萬峰亭僊游館僊山庵碧霄道院

天游觀在天游峰頂元道士劉碧雲張希徵建國朝永樂間法師弄丸子棲真於此歲久朽壞嘉靖五年道士詹本初重建

三友堂在天游峰上萬曆間耿定力鄭邦福李瑄同建



純陽祠在天游峰上初建葛屺瞻生祠今改建  
僊掌巖在僊掌峰下已廢嘉靖中巡按樊獻科建  
僊掌亭於天游上

天均亭在天游峰頂楚人周思久建

森天閣在天游峰頂崇禎戊寅直指張公肯堂建  
文簡公祠在陷石堂元時建祀劉文簡公燭今廢  
石堂寺在僊掌巖西唐武德初建五代天成中遷  
大隱屏下宋明道間雷震石隕寺陷爲潭元皇慶  
六年移建星村盤陂 國朝嘉靖中復建小庵于

### 唐時故址

萬峰亭在天游峰後妙高臺之上舊名聚景亭侍  
郎程文德易今名

僊遊館在六曲溪之北舊名晞真館宋紹興間漁  
人得遊僊石刻于巨浪中傍題曰子真書不知子  
真爲何人而筆勢甚奇因從其名

僊山庵一名山當庵在三仰峰下累石爲門濬地  
爲池歲久頽廢嘉靖間重建

碧霄道院在三仰峰頂上爲玉皇閣中爲三教堂



七曲 凡一條

七曲之上有天壺道院

天壺道院在北廊巖頂天壺巖下

八曲 凡五條

八曲之上有兩巖道院鼓子道院翠虛齋碧雲庵獨善堂

兩巖道院在鼓樓巖下本吳世卿書堂後改道院鼓子道院在鼓子巖下倚巖爲屋地勢峻絕舟至五曲已見其室若在天上絕頂有石穴有吳公洞

弘治間火嘉靖初復建

翠虛庵一名三鼓庵在鐘模巖前今廢

碧雲庵與靈峰相對上有禱雨亭

獨善堂在鼓樓巖下熊蕃建

九曲 凡六條

九曲之上有清微太和宮霧峰玄都觀杜清碧宅萬卷樓思紹堂儒林祠

清微太和宮在九曲溪頭元道士彭日隆開創中有清虛堂凝雲閣宜晚亭舊名和陽道院三十八



代天師改以今名永樂十四年爲洪水所漂  
霧峰玄都觀在九曲溪頭白雲巖下元時里人余  
藥坡建修道於此初名道院太守李真嶠奏賜今  
名趙子昂書扁後廢成化年方士王道元建  
杜清碧宅在平川內有思學齋懷友軒詳見寓賢  
紀

萬卷樓在平川元詹景仁建

思紹堂在平川杜本之孫圻建

儒林在九曲盡處元詹景仁建與杜本之讀書其

中

九曲山南 凡四條

九曲山之南有齊雲庵王城廟靜可書堂清龢道院  
齊雲庵在齊雲峰下

王城廟在山南十里魏王子騫故城舊志以爲同  
原卽其地

靜可書堂在山上元詹景韓建

清和道院一名江源庵在山南

九曲山北 凡九條



九曲山之北有天心庵養恬庵呂僊亭清微洞真觀  
猶龍道院崇玄館仰雲庵招僊館李見羅書院  
天心庵在火焰峰右馬頭巖左據武夷諸峰之中  
舊名山心永樂間庵廢嘉靖七年道士韓洞虛重  
建龍虎山天師張彥頽扁以今名  
凝雲庵在馬頭巖下其中有息機窩鳴球亭涌翠  
臺橋隱

養恬庵在杜葛巖頂嘉靖年中邑人吳北部立隱  
歸於此故名

呂僊亭在景陽洞杜葛巖右

清微洞真觀一名唐曜洞天在水簾洞之石壁下  
宋道人江隱心建

猶龍道院在水簾洞東北萬曆間道人汪清慧建  
崇玄館在玉華洞下名曰幽微碧玉洞天今廢  
仰雲庵在鑄錢巖萬曆中建

招僊館在黎道巖頂

見羅書院在九曲盡處名後溪督學徐卽登建見  
羅謫戍漳州聚徒講學於此置有田三十五畝爲



武夷山志  
修葺伏臘之費

武夷山志卷之二終

武夷山志卷之二

溫嶺東仲藹訂修

題刻篇

杖屨探奇轉盼輒雲飛鳥沒古人所爲重題  
識也昌黎勒名嵩山坡公紀書潭壁睹黑電  
而興思高深固與之俱永矣茲山之考亭九  
峰曷多讓焉嗣是而摩鐫殆遍于佳境其爲  
輝映峙流者固多貽誚于黥劓者政復不少  
是編僭爲點定至若羯胡之筆前牒濫收茲



盡芟去亦國風不列荆楚之義

統計二十四條

虹橋版附錄

題識石

在九曲溪頭晉郭璞留識云黃岡降勢走飛龍鬱鬱蒼蒼氣象雄兩水護纏歸洞府諸峰羅列擁神宮林中猛虎橫安跡天外狡狴對面崇玉佩霞衣千萬衆萬年僊境似崆峒

按晉時未有七言律疑爲後人之作

唐刻石

在幔亭峰下石刻云唐天寶七年歲在戊子七月封名山大川登仕郎顏行之記此石舊在萬年宮門外同亭湖畔後湖陷石墮水中今水竭時猶彷彿可見

幔亭峰刻石

幔亭二字高廣二丈許運同楚人蔡宗憲書

萬年宮扁額

武夷山三大字宋游九言書

天下名山第一明葉詮書



朱晦翁權歌刻石

在九曲溪傍分刻皆晦翁真蹟

換骨巖刻石

建寧大守無畏居士胡師文敬造武夷換骨僊巖  
紹興乙亥十二月張其王華國同來幕賓王用尉  
石景元俊後至

致和丁酉古艷李景來貳府事瓜期俯仰因過武  
夷游換骨巖瞻禮聖跡久之謾書一絕以紀其實  
區區三載抗塵顏拙直無因脫訪讒今日捫蘿扣

僊室願將凡骨換雲巖庚子六月十二日

一曲刻石

九曲溪三大字宋開禧丁卯趙師巖書

福建提學副使朱衡將之蜀携諸生游久旱霖雨  
沛下山峰如濯景物鮮明時皇明嘉靖甲辰六月  
四日

隆慶元年三月望後殷從儉自閩赴浙來游武夷  
沂流謁紫陽書院愛其巖壑幽勝不殊粵中徘徊  
久之時天子新政民物熙皞艸木鳥獸咸若斯游



也道逢運泰情與景會視有餘樂因書以識歲月  
戚大將軍繼光曰大丈夫既南靖島夷便當北平  
胡虜黃冠布袍還期游此

虎鼻巖刻石

知動仁靜

水光石刻石

修身爲本豫章李材書

兜鍪峰刻石

千崖萬壑宋儒蔡九峯書

印石刻石

印石二隸字建州刺史華容謝上箴書

題詩巖刻石

咸淳戊辰三司奉朝旨鼎建武夷書院開山職教  
者蓮蕩宴氏之孫午鳳

至元庚寅之春劍南母逢辰修創書院董役者趙  
必祉安天民熊禾詹光祖彭文甫書

鷄窠巖刻石

淳祐二年閏六月二十三日宛陵饒虎臣來游是



日也溪風歛雨山雲澄靄朝循一曲沂流而上暮宿五曲艸廬而歸

金鷄洞刻石

飛翠流霞沈涵書

雲窩刻石

雲窩

大隱屏

伏虎巖

梯雲 皆陳省書

振衣岡 范含虛題

接笋刻石

接笋二六字陳省書

嘉靖己未冬十月十七日縉雲樊獻科按閩之暇偕督學君宗臣訪汪劉二真人于大隱屏之巔獻科因題其居曰懷山館名其泉曰僊掌露宗臣爲文記之獻科復書此志之

撞冠石刻石

昇真元化之洞六大字宋開禧壬寅建陽游九言



書

淳祐元年季秋月圓後二日清源魏國表會稽呂秉南山東彭永年雨中來

僊掌峰刻石

壁立萬仞長樂陳省書

蒼屏峰下刻石

逝者如斯晦翁書

響聲巖刻石

何叔景朱晦翁連高卿蔡季通徐宋臣呂伯恭潘

叔昌范伯崇張元善淳熙乙未五月二十日

淳熙八月乙未劉彥集岳卿純叟廖子晦朱仲晦來

蔡杭自江左移憲浙東便道過家泛舟九曲積雨新霽山川呈秀哦咏而歸同遊者謝元龍藍簡子蔡勳吳載詹復子公亮時淳祐己亥仲春

城高巖刻石

空谷傳聲陳省書

一線天刻石



太保屏三字

風洞二大字宋景定元年春建安省齋翁自強書  
梅山劉袞道士鄭德建詹德成張道臻淳熙壬寅  
三月五日來道過詹元鼎父子載酒俱游捧硯吳  
元泰

宋五甲寅夏閏乙未後山翁泳蔡公亮瑤田詹復  
同游九曲邂逅園田詹然于大隱屏下相拉觀一  
線天之勝然之弟炤載酒來會引觴命酌誦朱夫  
子神斧之章慨然有感援筆賦詩題名而歸公亮

書然鑄石

水簾刻石

噴龍涎

劉岳卿幾叔招胡希聖朱仲晦梁文叔吳茂實蔡  
季通馮作叔陳君謨饒廷老任伯起來游淳熙辛  
丑七月二十三日仲晦書

龍湫漱玉

杜葛巖刻石

景陽洞天吳中立書



虹橋板

附

峰窩巖縫諸處遍插有直豎而若拄笏者有倒垂而若懸筓者有如朱栱如丹楹如雕闌者自秦逮今風雨摧凌不朽不墮好事者百計攀取不獲常有雲氣伏其中

武夷山志卷之三終



